



Алексей МИШАРИН

ТУРУН ПУКТИГОН

ВИСЬТ

Гожом пуксытөдз на Миша да сылөн ёртъясис шуисны мунны уджалан-шойччан лагерё. Кутасны заптыны турун совхозса видзъяс вылын. Совхоз лөсьбодис куранъяс, вилаяс, сёян-юан дозмук. Лым сылём бёрын зонкаяс асьныс дзоньталісны кык куртан машина. А июль өтикөд луно ставон чукөртчисны школаө. Сэни ставсө бура висьталісны, кодлы мый ковмас вөчны. Отияс кутасны куртны, мөдъяс — зорөд талаявны да чөвтны. Медбөрын Анна Михайловна, лагерон веськөдльсь, корис бөрийны лагерса совет да председателёс.

Мишалы зэв окота председателънас лоны. Став челядь вылын ыджыдөн. Сійө тувкнитіс Ваня другыслы бокас:

— Менө висьтав!..

Но Ваня бөбмыліс тадзи йөткыштөмсьыд, и сэк кості бөрвывсынь Коляөс горөдісны. Буретш сійөс, коді воис орчча сиктысь да первой во на накөд велөдчис. Этша на и кадыс колис, но сійө кызкө быттё и кутіс нин сайөдыштны Мишаөс йөз син водзысь.

А өні со Коляөс весиг председателё бөрийны көсйөны. Кыдзи ташөмтортө терпитан?

Анна Михайловна весиг радлө:

— Коляөс? Позьө,— шуис сійө.— Кутам гөлөсуйтны.

Ставон лэптисны кынысө. Отнас сөмын Миша эз. Сійө заводитліс и Ваня другсө өлөдны: эн пө лэпты, но мөдыс эз кывзысь. Миша ёна дөзмис сы вылө ставсыс.

— Другөн шусян,— ыждаліс гортас локтигөн,— эн вермы менө шуны!

— Коляыс абу жө лёк,— дорйысис Ваня.

— Он өмөй аддзы, быдлаын нырсө лэпталө!

— Мед сідзкө чеччин да-й висьталін сэні.

— Висьталін!— нерышитіс другсө Миша.— Тэ на, друг морт, вермин шуны.

Мөд луннас асывсыньыс нывкаяс да зонкаяс мөдөдчисны матысса видз вылө. Енэжын шонді вашъялө, онялө шоньд. Видз вылын быд ловъя лолыс сылө-лэбалө.

Пусысыяс, челядь пиысь жө, муісны ю дорө биасыны, куртысыяс додьялісны вөвъяснысө куртан машинасысө, а юр кыскалысыяс гөрд сэтөр кустыяс видлыны рөдтісны. Налы нинөм на кыскавынысө. Юрасыны юкисны кык пельө. Отар звеноас веськөдлө Коля, мөднас — Анна Михайловна. Миша да Ваня орччөн сувтісны. Первойсө сьөкыджыка пансис уджыс, ун пальөдігмос. А сэсся өддзисны, пөсвятөдз лои.

Миша лёдзсө куралө и видзөдывлө Коля вылө, коді панйыны сійөс кутіс. Тайө Мишалысь синсө ок кызди вежө!

— Час, видзөдла кутшөм юрыяс вөчалө,— шуис Ванялы да шавксьөдіс Коля дорө. Матыстчис, өти юрө чужйис, мөдө. Друг син улас усн, мый өти юрлөн вылысыс искөвтөма да-й ичөтджыкөн кажитчө.

— Ноко, видзёдлөй юр вылас!— горөдіс видз пасьталаыс.— Со кызди уджалө Коляыс! Тадзтө, дерт, водзө петас. Китруйтө!

— Мый?— воча уськөдчис мөдыс, пөсьсө кымөсьсыс чышкыштиг-моз.

Зыксьсыяс дорө чукөртчисны ёртьясыс. Өтияс Миша дор мунөны, мөдьяс Коляөс дорйөны. Матыстчис и Анна Михайловна.

— Адзөмаөсь тай венласьны. Коля, лөсьөдышт киссьөм юрсө и ставыс.

И збыльыс, юрсө лөсьөдөм бөрын веныс кызди кыптыліс, сідз жө другөн кусі. Видзөднысө, дерт, кусі, а мый вөчсьө лов вылад — оз тай тыдав.

Пажын бөрын Миша нуөдіс Ваняөс бокө, бадь кустьяс сайө да шөпкөмөн шуис:

— Өні мый кывлан, некодлы он висьтав...

— Ог,— вашкөдөмөн жө вочавидзис Ваня.

— Со зорөд дорас льөм пу. Анна Михайловна сэтчө өшөдө ков-тасө, а зептас часісө кольө, мед пө оз жугав уджалігөн. Өти здукөн ча-сіыс вермас лоны Коля гач зептын. Гөгөрвоан?— Миша вөчис нейджыд кост, водзө висьталіс:— Анна Михайловна казялас, кыптас шум. Ку-тасны туясыны, кытчө воши. А сэсья и сурас часіыс Коля гач зептыс. Кыптас шум: со пө тайө и председатель!..

Ванялөн, ёна чуймөмысла, гөгрөсмисны синьясыс:

— Да тэ нө мый? Йөймин али мый?— төкөт्यों эз горөд сійө.

— Эн пов, некод оз төдлы. Коляыскөд өти здукө дурышт, а ме сэк кості зептас часісө сюя.

— Ме ог пов, но вөчан кө тадзи, ме... Ме...— Ванялөн весиг кыв-йыс эз кут шедны.

А тайө кадө ю вылын кыптіс гаж, серам. Нывкаяс да зонкаяс ку-пайтчисны. Берег вылын некымынөн сөмын тутшвидзисны, быттьө гобьяс. Миша өдйө пөрччысис да тшөтш ваө бузгысис.

— Эй, другьяс, коді оз пов, мөдарас вуджалам!— кыліс сійө Ко-ляляыс горөдөмсө.

Зонкаяс лөсьөдчисны варччыны. Миша та пасьта юсө эз на ву-джавлы. Гашкө, эськө эз и бөсьтчы, Коляыс кө эз горөд. Өні жө сылы войт мында эз көсьысыс сеччыны.

Коді кызди кужө, сідзи и варччө. Өтияс — пон моз, мөдьяс — сун-ласьөмөн, коймөдьяс — сынөны, Миша пароход моз буткө, бузөдө кокьяснас. Мөд ногсө оз куж да өдйө мудзис. Қайтчыны нин кутіс, мый вөтчис ёртьясыс бөрся. Дзикөдз эбөсыс кутіс бырны, киясыс да кокьясыс сьөктаммисны. А берегөдзыс ылын на. «Вөя»,— югнитіс ве-жөрас, и ачыс эз төдлы, кызди юрнас бердіс ваө. Таб моз бөр мыч-чысис да мыйвынсыс горөдіс:

— А-а!..

И тшөкмуніс. Но сәки кодкө кватитіс сійөс коскөдыс. Бөрыннас нин төдіс мездьсысө — Коля вөлөма. Гөз-мөд зонка нөшта варччисны на дінө, тшөтш отсалөны пикө воөм Мишалы. Қор воисны лажмыді-нөдз да сувтісны кок йыланьыс, Миша кутіс шуавны:

— Виччысьтөг лолыштчис да ваыс пырис пытшкөсө. Муртса эг пөд. Сэсья и вынөй бырис.

Но сәки кодкө вильыша горөдіс:

— Он лючки куж варччынытө да!

Пажын бөрын Миша важ моз уджаліс Ванякөд орччөн. Видзөд-льыліс другьыс вылө, но лөбмтор йывсыс сёрни эз пан. Мөдыс чөв жө оліс. Миша виччысис, мый вөйны заводитлөмысь челядь кутасны серавны. А найө, мөдарө, жалитісныкодь сійөс. Коля сөмын, повзьөм чужөма, Анна Михайловна водзын дорйысис: варччыны кужтөмьяссө пө мөдысь ог сэсья лэдзө джуджыдінас. Тайөн и помасис делөыс. Се-

ралісны да відісны кӧ, гашкӧ, кокныдджык вӧлі сьӧлӧм вылас Мишала. А ӧні коньӧр туйӧ быттӧ лои.

Рытыввывсянь мыччысисны сьӧд юра кымӧрьяс. Матыстчисны ньӧжйӧник, но ӧтарӧ пыр кызісны.

— Челядь, элӧдчыламой!— горӧдіс сійӧ.— Зэрмас, чорыда.

Ставӧн видзӧдлісны повзьӧдчысь кымӧрьяс вылӧ. Уджыс тӧдчы-мӧн ӧддзис. Зонкаяс да нывкаяс став вынсьыс зілісны чукӧртны лӧдзьяссӧ, кодьяс шыльквидзисны видз пасьталаыс, зэв уна. Весиг вӧла куртан машинаясӧн дугдісны куртны да тшӧтш юрасьны заводитісны. Турун вӧсна тӧждлуныс паськаліс и юр кыскалысьяс пӧвстыи. Найӧ тэрмӧдлісны ассьыныс вӧвьяссӧ. А чӧвтысь мужикьяс ӧтарӧ тэр-мӧдлісны: зільджыка, зільджыка пӧ!

Ваня пӧсялӧма, мышку шӧрӧдыс зэв ясыда тӧдчӧ дӧрӧм пыр мыччысьӧм ньылӧмыс. Сійӧ шамырмас сывьяс, мый вермас, турунсӧ да котӧрӧн нуас юр дорӧ.

А Мишалаӧн надзмӧма вӧрасыс. Жуныгӧма, тыдалӧ, зонмыдлы. Кор выліын йиркнитіс первойя гым, весиг думнас радлыштіс, мед пӧ-й зэрмас, дышӧдіс нин.

Бівлаыс тӧвзысис. Кутісны воавны гырысь зэр тусьяс. Сэсся кызд тай сярӧбтіс!

Челядь котӧртісны зорӧдлань. Тэрмасьӧмӧн тювкниталісны пинь пыкӧдьяс костӧ. Здук мӧд мысти зорӧдувса дзебасьясысь быттӧ джыджьяс юрьяснысӧ гоньӧдлісны. Мыччалісны княссӧ войтва улӧ.

А чӧвтысьяс жалитісны: муртса пӧ эгӧ удитӧй сигӧртны дзоньнас. Сэсся асьныс асьнысӧ жӧ такӧдісны, оз пӧ кузя зэр. Аски зорӧд вылыссӧ разӧдласны да ӧдйӧ шуралас-косьямас.

Медбӧрын зорӧд дорӧ воис Коля. Брод кӧтасьӧма, паськӧмыс лякысьӧма яй бердас. Юрси кузяыс и бан бокьясӧдыс визувтіс ваыс. Коляыс, кор войтасьны кутіс, уськӧдчис юр сюртысьяслы отсыштны.

— Коля, лок татчӧ!— чукӧстіс сійӧс Ваня.— Кос и шоньд тані. Миша, вешйышт.

Коля пырис на костӧ, лякысис косӧн да шоньдӧн ӧвтысь топыд турун дінӧ.

Час джын кымын кисьтіс вывсянь. Вочасӧн сэсся бӧр кобис. Кутісны воавны посныдджык зэр тусьяс, а сэсся дзикӧдз дугдіс зэрны. Бӧр мыччысис шонді.

Челядь петалісны дзебасьясысь. Мӧдӧдчисны гортаныс. Видз вылын ӧні налы нинӧм вӧчны. Ваня отсаліс Колялы пыдзравны паськӧмсӧ, а Мишаӧс корис виччысьлыны, ӧтлаын пӧ мунам.

— Зэрӧм бӧрад чериыд шедӧ, и ваыс рытнас шоньд,— пыдзрасигӧн сӧрнитіс Ваня.— Ветлам?

— Ме талун сідз нин пӧт васьыс,— ылӧсас нурбыльтіс Миша. Сылы век на вӧлі яндзим лунся купайтчӧмысь.

— Кӧсьян, ме велӧда тӧйӧ варчыны?— сьӧлӧмсяныс шунс Коля.— Вежон мысти менӧ кутан панийыны.

Миша лӧптыліс снӧвьяссӧ председатель вылӧ, но немтор на эз шу.

— Миша, збыльысь велӧдчам. Ме тшӧтш кута. Ог жӧ на бура куж да,— казяліс другыслысь майшасьӧмсӧ да шыасис Ваня.

Миша видзӧдліс ӧтиыс и мӧдыс вылӧ, сэсся кыв шутӧг мыччис веськыд кисӧ Колялы.

А вежӧрас сӧк сылӧн чужис кутшӧмкӧ зэв тӧдчана мӧвп: со кутшӧм сяма морт, гашкӧ, меным нинӧмла и эм скӧравнысӧ, мый эз менӧ бӧрйыны председателяс. Коляыс пӧ, гашкӧ, ӧні туянаджык на и эм та вылӧ. Мукӧдыслы ӧд, бокисяньыд, тыдалӧджык...